

掌故叢編

第六輯

掌故叢編 第六輯目錄

清宣宗像

影片

允禩致何焯書二

影片

朱廷翰陳三事本

王守履自劾本

許作梅祈賜處分本

向玉軒畿地圈撥將盡本

郝傑乞賜進士袍服本

楊璜議獄以弭天變本

以上六本 廿八至卅三 計六葉

鄂爾泰摺

三十至三十九 計十葉

年羹堯摺

二十至二十九 計十葉

英使馬戛爾尼來聘案

三十二至三十八 計七葉

徐述夔詩案附殷寶山案 十三至二十一 計九葉

西征隨筆 五十至五十七終 計八葉

朱廷翰陳三事本

雲南道試監察御史臣朱廷翰謹題爲圖治必揆其要用人當審其幾謹獻芻言以裨上理事臣聞古聖賢之治天下也必聯上下爲一體式銓序如平衡故能興起事功振隆德業臣有三言冒塵天聽冀以埃露仰佐嵩溟一曰和衷之宜協也皇上開創大業當出震有爲之時滿漢諸臣師濟盈朝正竭智圖功之會謂宜肝膽相照謀斷相資濟濟師師共理國是儻有一毫之意見未融終必至於枘鑿而誤事皇上亦安用此營私背公之臣爲也此爲宜協者一一日詔旨之當信也南都歸順推補各官不知奉幾綸音今則江西湖廣又入版圖矣乃自都察院題差御史數員而外不聞推何督撫用何司道夫郡縣有司猶可委署此等授鉞建節之官不出自部推簡用何以撫綏黎庶彈壓地方豈吏部實鮮其人遂

其難而其慎乎此爲當信者二一日元惡之當問也臣待罪歷城稔聞南官貪毒兇殘惡聲載道而馬士英阮大鍼爲尤甚始則置君如奕棋急則挾君而他遁不忠不義罪業彌天今投順臣中無二惡之名藏機巨測豈其恃姦雄之故智營兔窟而倖免於斧鑕乎果爾則南都百萬生靈之恨何由雪也此爲當問者三臣所陳三事皆目前之急務不敢膚泛勦拾伏乞皇上裁察施行爲此具本謹題請旨順治二年閏六月初十日

旨言官論事須詳察確指不得含糊揣度屢經申飭這本內意見未融營私背公等語俱屬含糊朱廷翰著回將話來南官事在赦前不必追論推用官員事宜遵屢旨行該部院知道

王守履自劾本

廣西道監察御史臣王守履謹題爲國是不可不明臣節不可不

立謹束身自劾伏祈聖明罷斥以全耻心事臣山右豎儒久放林
泉欣逢聖主天開蕩寇救民起臣田間改授臺員感激思奮期以
耳目之官自盡厥職遂不識忌諱具特糾奸貪敗類一疏恭論首
輔馮銓等在臣愚昧有激於衷有聞必告知有盡忠報主之一念
更不知有情面罔顧小嫌故冒昧披陳一聽聖裁乃荷蒙皇上皇
叔父攝政王寬仁留中不發概示優容併宥臣指斥大臣之過不
加罪斥仰沐高厚再生之恩宜何如捐糜以圖報稱敢自求退但
臣有言責不得其言則去所關臣節匪細若從此畏忌不言於臣
爲溺職而苟容不去狂直復鳴必且言出而禍隨況以屬員指及
堂官一衙門內上而率屬面目之難施下而稟成芒刺之負背尙
安能效職業振風紀哉且臣更有疑焉前奉有屢著自行回奏非
阻塞言路正欲求其實據之旨迺李森先之革斥已駭聽聞而莊

憲祖據實回奏又摘句飾怒未問先行革職非借票擬作威顯示
阻抑言官乎從此日事摧折言路黯然無色誰不以言爲戒縱有
忠言讜論恐人人自危咸思結舌矣臣櫻衆怒必將伺隙割刃朋
謀傾陷尙敢論壹人言壹事爲我皇上效耳目之官乎伏乞聖恩
蚤賜罷逐以謝諸臣以存廉耻庶國是不至日非而臣節不至掃
地矣臣不勝感激惶悚隕越待命之至爲此具本謹題請旨順治
二年九月初七日

旨王守履疏參馮銓等事涉無據不必引咎求罷仍照舊供職該
部院知道

許作梅祈賜處分本

工科給事中臣許作梅謹題爲君父之量愈寬臣子之心益愧祈
賜處分以存廉耻事臣聞公是公非天下無相岐之理爲黜爲陟

朝廷有一定之衡斷未有一事而是非兩持黜陟彼此各異者臣
以使署蒙聖恩拔置言官非不知柔曼取容多言取咎但生昌言
之朝事堯舜之主而容悅是甘爲身家計則得矣上負隆恩下虧
職業爲何如者故不徇人情不畏權貴有指參馮銓一疏忠君愛
國人各有心此台臣之交章所自來也致煩皇叔父攝政王召臣
等親訊一堂吁咈千古無兩仍宣布皇上求言責實之心優容臣
等空言無當之罪其面諭有曰此等本章俱留中不發抄傳大哉
王言一語包荒真天地父母之心也臣跪聽綸音悚仄無地退思
補過正欲具疏求斥而台臣李森先奉旨褫革臣用是益增惶愧
矣竊思聞過引避古大臣之風臣何敢以大臣自比若言官失言
卽爲曠職尙可覲顏立於青瑣之班哉雖朝廷不加譴謫而君恩
愈重臣罪愈深臣與森先其職同其言同森先已有顯罰而臣晏

然於其位問理問法俱有所不安也數日以來反躬自責惟去就之義先明斯禮義之坊可立懇祈聖明將臣處分庶是非不兩立而黜陟畫於一矣是拔臣於言路不能爲補闕拾遺之臣放臣於草野猶得爲耕田鑿井之民也伏候聖鑒施行緣係君父之量愈寬臣子之心益愧祈賜處分以存廉恥事理未敢擅便謹題請旨
順治二年九月十三日

旨許作梅等御史言不實之事朕已槩行寬宥今許作梅不肯自已復切求去官即如願准去著革了職永不叙用該部院知道

向玉軒畿地圈撥將盡本

吏科都給事中臣向玉軒謹題爲畿地圈撥將盡殘黎死徙日多敬陳一得以安子遺事竊聞國以民爲本而畿輔尤在所先故民生遂則邦本固畿甸定則四方寧從來聖帝明王祈天永命必由

此也自國家定鼎於茲即察屯地與勦戚絕產及民間無主荒田安插滿洲竊意滿洲雖多百萬之衆處之裕然已今三百里內不足則遠及五百里無主之地不足因概及於有主以致民衆失業苦不忍言臣細求其故不能無說而處此如滿洲分地原以口計今諸大人之地廣連阡陌多至拋荒則亦委於無用已獨不可稍行限田之制乎諸王校尉則有地各色匠役則有地市民投入則有地甚至闔宦刑餘則有地以此輩從來不知稼穡授之土田如搏畫餅獨不可復工食而禁投充乎如保定河間二路本西南孔道沿途村店皆行旅借以停驂而通津運河一帶漕艘商舶銜尾往來其河干居民非擊柝防奸則荷鍤疏淺今皆圈佔是以行旅驚畏裹足不前獨不可留之以通水陸之道乎仰誦明詔田地許令兌補已然一應家仗器用誰爲之兌補者况所補之地力不任

開墾則西成無收穫之望力即任開墾則將來有再佔之憂無惑乎民間展轉流離哭聲遍野椎埋行劫狂吠時聞夫今日之遊魂亂賊即前日皇上之織婢耕奴也從此生計既枯勢歸於盡不知此五百里內將來士流孰爲恒產錢糧何人辦納粟草料豆何人運搬此又不可不爲經久慮也臣猶記前年遭寇民方在湯火之中一聞王師拯救鼓舞歡呼視皇上之畿內如登春臺視皇上之東來如依慈母就此一念愛戴之殷尤不忍其顛連也臣爲此言非不欲朝廷安插滿洲也但不以收投充養雜役而取民間之田則厚幸已以事關民生字稍逾格伏乞皇上鑒宥施行爲此具本謹題請旨順治三年二月二十二日

旨戶部知道

郝傑乞賜進士袍服本

兵科都給事中臣郝傑謹題爲多士已見登庸袍服原有舊例伏乞聖明特賜舉行以光大典以示鼓舞事竊照帝王開國首重賢科蓋誠知戡亂以武經邦以文故遠人不服不尙戈矛但修文德此削平之要道也邇蒙皇上加意人才首闢賢關多士業已濟濟登庸行見應運而興者或爲閣上之夔龍或爲閭閻之召杜猗與盛哉千萬年之基業始於此矣然歷朝往例進士放榜後賜進士袍笏三日以寵異之其事起於唐盛於宋元明朝踵行之非一代之創典也蓋士子草茅誦讀思得一日以爲榮顯使其登第之後冠服猶人黯淡無色區區虛名何足以鼓舞天下士哉則開創之始規制宜定况龍飛首科尤四方之所瞻企者乎伏乞皇上崇文重儒銳意更始仍照歷代舊例賜進士袍服以示優異則賢才已售者自當感激以報國恩其未售者亦必磨厲以思效用從此朝

多吉士野無遺賢大一統之勢成矣則袍服一事所關豈小哉伏
乞立賜施行臣無任激切待命之至緣係多士已見登庸袍服原
有舊例伏乞聖明特賜舉行以光大典以示鼓舞事理未敢擅便
謹題請旨順治三年三月初三日

旨據奏新進士冠服唐宋元明俱有舊例著詳察確議具奏禮部
知道

楊璜議獄以弭天變本

刑科給事中臣楊璜謹題爲籲閣議獄以弭天變事臣聞日食修
德月食修刑古帝王承天治民敬謹固若斯之至也今月食十二
分有杪自亥至丑詎云小變臣聞陽爲德陰爲刑以類相考是必
有苛刑冤獄干上帝之和者臣恭繹皇上皇叔父攝政王臨御以
來事事皆足徵召嘉祥近日惟九家連坐用法太重行路傷心而

深宮不聞科臣獻疏而轉環未得月食示警端必因此臣聞事天以實不以文陰雲濃蔽當食之頃忽焉開霽其欲明示譴告之象天意固章章矣伏乞皇上皇叔父攝政王渙明詔戒獄官議重罪庶變異可回和氣可致若遇變不加深省臣恐天心仁愛無己必當嗣告以災不可不懼臣濫竽刑垣言刑固屬臣職況目睹變異豈敢自昧補闕之義不爲聖主披瀝陳之緣係籟閣議獄以弭天變事理未敢擅便謹題請旨順治三年陸月十八日
旨敬天修德正道至理這本說月食由匿逃隣佑坐法太重沽名釣譽簧鼓是非莫此爲甚本月十五夜月食分數該監湯若望預於二月二十日已推算奏明九家連坐之法五月初五日始下何得爲天變係此連坐情由旨諭分明楊璜竟不思繹輒敢悖慢妄言好生可惡該衙門知道

查處分窩逃例順治三年間以先定窩逃之人處斬其九家及
甲長鄉約俱流徒嗣後定議窩逃之人及兩隣俱止流徙甲長
併七家之人各鞭責順治十年間議定兩隣十家長止各懲責
現今遵行例雍正二年議准逃人在該地方居住已過一年者
十家長隣居及窩逃之家俱懲責不及一年者免議

附於原本之後當為雍正
時由內閣查例奏上者

按此條係
別紙所寫

鄂爾泰復論西藏事宜摺

雲南總督臣鄂爾泰謹奏爲遵奉訓諭事雍正五年十二月二十一日接准兵部派兵咨文臣隨將各項事宜逐一料理分晰臚列於雍正六年正月初八日摺奏在案茲於正月十九日賚到臣十

一月摺荷蒙硃批西藏又出一可趁之機矣中略偶書贅於諭後

欽此又奉錄頒勅諭噶爾丹策凌一摺欽此臣跪讀之下茅塞頓開不勝踴躍竊臣前所慮者謂或機無可乘自應時復少待既恐前後藏之或一心又虞諄噶兒之多異志彼據一挾喇嘛之勢以鼓惑衆番彝之愚則事多掣肘功難驟效不若靜以觀其變安以覘其危然後一舉而定此臣之所以竄陳也今婆羅甯既已操戈策妄阿拉布坦又已身故挾喇嘛之生路已阻構釁助西藏之理又絕唐古忒既勢分爲二羅卜藏丹盡復責之策凌是誠上蒼賜

佑之機亦實聖祖未了之志我皇上至誠達孝籌畫萬全爲社稷
生民休戚之計圖國家內外永遠安靜之謀明若列眉洞如觀火
臣即愚昧亦能料西藏事之易於清楚迨西藏事既已清楚則羅
卜藏丹盡事又可以逆料蓋因機識機機在速密臣敬讀聖諭必
滅此而後朝食一語心動神悚無任激切所有派調官兵撥運糧
餉各件已悉照前摺辦理并檄令各營俱限於三月二十五日赴
劍川會齊前進中旬俟部文或川省文一到卽速進義本多會兵
料大兵到藏不日即可成功一切機勢睿算無遺臣再三紬繹實
不能更贊一詞但定藏功成尤務須詳慎一勞永逸之圖端在此
舉在聖主遠略原欲安藏以安唐古忒等并各蒙古諸部落非僅
爲阿爾布巴羅卜藏丹盡計倘總統諸臣不能仰體但就事辦事
並不籌及將來竊恐稍有粉飾必致仍貽患害况前西藏之役因